

Enlongia I Troi de la Pèsc

N nef projet per la comemorazion de la fin de la Pruma Vera e per la sensibilizazion su la pèsc

Evenc - L'à inom "Enlongia I Troi de la Pèsc" l nef projet che vegn proponet te Fascia via per l'istà 2018 per la comemorazion de la fin de la Pruma Vera. L fil che learà duc i evenc l'è belapontin la pèsc. Per chest l'è stat dezidù de concentrèr duc i intervenc sul "Troi de la Pèsc", n troi fisich ma ence na linea simbolica che lea adum dut l Trentin e che passa fora ence Fascia ajache l ponta demez dal Jouf de Sèn Pelegrin e l rua fin sun Marmolèda.

L projet, con a cef l'assessora a la cultura de Moena Ilaria Petrone e capofila l Comun general de Fascia, vegn endrezà da la colaborazion anter chisc enc: i Comuns de Fascia, l'Istitut Cultural Ladin, l'Apt de Fascia, i Comitac Manifestazions, la Sociazion "Sul Fronte dei Ricordi", la Scola Ladina, l'Ofize Sport Check Point, i Compagnadores del teritorie e i Menacrepes de Fascia.

Per recordèr i 100 egn da la fin de la Gran Vera la Provincia de Trent à metù a la leta finanziaments da durèr per scomenzadives che auze fora belapontin la pèsc. L desch de lurier à metù jù n projet dal cost de 65 mile euro che vegn corii con 50 mile euro da contribuc de la PAT e l rest dal Comun general con la partezipazion de l'Apt e di Comuns de Fascia.

La scomenzadiva "Enlongia I Troi de Pèsc" perveit trei sorts de intervenc. Dant da dut vegnarà realisà tulins e totem informatives da meter sul teritorie, en dut se trata de 23 postazions da loghèr anter Navalge e Pian Trujan. Sun chisc tulins vegnarà metù retrac storic con na curta descrizion, la chërta con l Troi de la Pèsc ma soraldut referimenc a la strutture espositives che l'è jà sul teritorie desche la mostres permanentes e i musees, ma ence obelishes, crouse, ferates e



L forte de Sameda l'è una de la strutture sul teritorie che fèsc pèrt del projet.

ciasamenc che à vèlch referimenc a la vera e a la pèsc. "Chest projet ne consent de far n investimenc sul temp lonch no demò per l'istà che vegn – à dit l'assessora Petrone – chisc tulins restarà sul teritorie per informar la jent sun chel che i pel veder ajache l'è n muie de possibilità che no vegn desfrutade assà. L'obietif l'è defat ge mosciar a la jent i segnes lascé da la vera e chest pel vegnir fat jan sul Troi de la Pèsc e vijitan le strutture sul teritorie."

Per arjonjer l'obietif ge vèl lurèr ence su la comunicazion. Per chest vegnarà endrezà viajes stampa, realisà e traslatà material de papier e online, endrezà evenc, escursions a tem e vegnarà ajornà la chërtes e i siti internet.

L terzo intervent sarà chel de la valorizazion del patrimoniè storic de val con l'obietif de ge trasmeter a la generazions del davegnir chel che l'è sozedù sun nesc monts e, te l'inom de la pèsc, sensibilisèr la sozietà percheche chisc fac aricegoi

no sozede mai più. Per chest l'è stat pissà a n moment de formazion di operadores turistics, menacrepes, compagnadores del teritorie e duta chela fegures che se relazionea col ghest, ma no demò, ence la scoles e la comunanzes per fèr cognoscer nosc patrimoniè culturèl e storic e favorir la sensibilizazion anter la comunidès. Chest pel aer ence na valuta economica per la val, ajache vegn creà neves posé de lurier, la Mostra "La Gran Vera" l'è n esjempie.

I Comitac manifestazions endreza per chest istà na lingia de evenc leé a chisc temes. A Ciampedel e Moena sarà l'espert Gabriele Mambo Valentini con sia conferenzes, a Mazin vegn endrezà n laboratorie fotografich e la proiezion de n documentarie de l'Apt, a Poza e Vich sarà l grop de atores l Bontemponi che portarà dant si spetacoi. Evenc, manifestazions e valorizazion del patrimoniè storic per uzèr fora l valor de la pèsc e sensibilisèr la comunanzes.

Monica Cigolla